

109 putation. Siamo stati di continuo e stemo su qualche praticata; nulla ni zuova, nè altro so che dire, salvo pregare l'Onipotente sopra i potenti, che el ne chavj de questo travaglio.

Quanto a' forestieri el consollo de' catelani e suo' marchadanti, non sono za molti e molti zorni in Cime, vano per la terra, a suo beneplacito, dove li pare e piace; e, ne li zorni pasati, esso consollo molte volte è montato in castello, et a faza a faza à parlato con el signor soldam, senza interprete, perchè lui ha benissimo la lingua turcha et rabescha. E, per quel che da molte bande se intende, par che l'abi promeso tal cosa al signor soldam, che veramente non si puol intendere, nè che, nè come; ma da diversi si ha intexo diversamente. L'altro zorno el chadl Nadraças, interloquendo, ne dise: El ne suno alcuni che promete far vegnir galie in Alexandria e far muda, come fatj vuj, e mandar consoli a Damascho, Tripoli, Alepo; e l'è da creder, che i non voglia dire de altri, che di questo consollo forestiero. Altri dichono che l'è promeso artelarie, navilij e l'armata del signor soldam, e si el potrà far che rodiojt non darà più molestia a sti lochi, e che 'l satisfierà el dano de' margabini, che con le barze francexe sono menati a Rodi. Raisamet, del porto di Alexandria, è tornato da Costantinopoli con gram copia de instrumenti per l'armata de India. Pochi zorni fa el me dise: Spalarga, Spalarga, io so quello che el consollo de' catelani ha promeso al signor soldam, ma, per esser legato a sagramento, non ti poso dir altro, le qual *sum* tute cose che me par impossibile, indichando che la fine sua dixerà esser chativa. El qual Raisamet à cerchato, con ogni sua forza et arte, darge ogni favore, laudando e digando, come le forze de la Signoria da mar sono più potenti cha maj, *tamen* el suo bon voler non ha avuto loco. Qualche uno altro dice, che questo consollo ha promeso che 'l farà vegnir orator di Franza, che hora è signor di tuti i christiani, per beneficiar meglio le suo raxon. El signor soldam molte volte li ha prestato orecchie, et hasse intexo, non però se habi per cosa certa, ma io credo ogni malle puj volte gradito non spazar a Venexia, perchè non ti poterò atender quel che ti ho promeso, et altri andamenti del diavollo. Non si puol puj, siamo zonti a sto paso, che la raxon nostra darne non el voleva, perchè non semo in colpa. Pochi zorni fa che el zonse in questo locho, salvo et vivo, 12 margabini, fuziti da Rodi, i quali sono montati in castello; non se intende quello i habino narato al soldam. Penso, che, bene de sto consollo, i non posino aver dito. In quel zorno

che i venne, o veramente el zorno driedo, esso consollo andò in castello per haver parlamento con el signor soldam, nè quella volta nè altra dapoì non ebe audienza. *Tamen* ge in Alexandria una sua nave raguxea (che Idio avese voluto la non fosse vegnuda!) con bote 60 de ogio . . . , mandole, mortasangue, piombi, et XV in XX carateli de nuce, divuolgendose, per lui consollo, come de altre ne die vegnire; *tamen* la sorse de fuora et ebe salvoconduto; el vender, el compra li è concesso con ogni libertà. De le robe nostre el signor soldam à comandato che, pagato se haverà el dreto de le 3 per cento di questa nave Contarina e de la nave di le frute, spazerà, e tuto el resto sia meso soto bola, e ogni cosa è interdita pui cha mai. Ben è vero le noxe e le chastagne *sum* stà contratate; quelle de sier Beneto Bernardo, per eser captive, sono in magazen. Se lo onipotente Dio non ge haiuta, parmi veder le cose nostre andar non bene. Questa era una glorioxa muda; se non era questo inpazo. Altro non si puol, pazienza; ma manchando in questo sfogho di qualcosa, suplirà per le altre letere.

109⁴ Abiando mandato do, over 3, supliche al signor soldam in nome del nostro consollo, dizendoli, se habiamo fato alcuno maneamento, che el si domandava perdonanza. El soldam sdegniato ha dito: Costoro hano fato questo erore del Sofi; e, dice, se havemo fato eror, domandemo perdonanza. Dove semo stà consegati, che se dovemo chiamar in colpa, chè el soldam è benigno, e non sarà haltro. Missier Piero Zen mai se ha vogliò chiamare in colpa; tuti i suo' marchadanti era di contraria opinion. El nostro consollo e nuj quel medemo, per modo el nostro consollo ha mandato un'altra suplica, digando e dimandando perdonanza di l'eror commeso, dolendosi non haver altro modo a far el suo cuore bon, salvo scriver a Venexia e farlj vegnire uno oratore honorato; et a questo paso de anbasadore missier Pietro Zen ha contratado, ma a dimandar perdonanza, mai non à voluto assentir. Il signor soldan ne ha mandato a dir, secondo el suo costume, e secondo come porta i andamenti dil paixe, che 'l non dimanda anbasador, ma che faciamo quel ne piace, *tamen* el ne ha grande apiacer, l'è cosa necessaria a far vegnire questo oratore per desprigar questa mafa; questo signor soldam vuol reputazion. Non si pol puj; el ne ha fato intender, come el non si duol de la illustrissima Signoria, nè mancho del consollo de Alexandria, ma duolse grandemente del consollo de Damascho. Si staremo qui fino el vegnirà questo anbasador, uno sollo, Idio, el puol